



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Kurtz Bekentnis vnd Artickel/ vom heiligen Abendmal des Leibs vnd Bluts Christi**

**Gedruckt in der Keyserlichen Reichsstadt Mühlhausen**

**VD16 K 2819**

Vorrede an den Christlichen Leser.

**urn:nbn:de:hbz:466:1-36686**

# Zorrede an den Christlichen Leser.

**E**s ist one zweiffel meniglich be-  
wust/ das aus verhengnis des gerechten  
zorns Gottes/ der für vielen jaren gefehr-  
liche/ geregte Sacraments schwarm/ nu  
eine lange zeit/ nicht alleine Deutschland/ vnd dessen  
löbliche vñ Christliche wolbestalte Kirchen/ Schu-  
len vnd Vniuersiteten/ zum beschwerlichsten betrü-  
bet/ angefochten vnd verwirret/ Sondern auch gan-  
tze vnd grosse Königreich vnd Lande/ anderswo  
angestecket/ begriffen vnd eingenomen hat/ mit be-  
schwerlicher/ vnaussprechlicher vnd vnergründlich-  
er klage/ schaden/ schmerz vnd betrübnis vieler  
Christlichen hertzen. Denn was in vnd mit demsel-  
ben schwarm vnd gift an denen orten vnd Landen/  
do er eingewurtzelt/ für schwere straffen Gottes/  
auffin fas gefolget/ das ist leider/ vnd Gott erbarm  
es/ am tage/ So ist auch in Deutschland/ welches  
numehr zur straffe reiff vñ vberstendig sein scheint/  
vber alles gethanes trewes wehren/ vermahnen/ fle-  
hen/ widersprechē vieler fromer Christlicher Obrig-  
keit vnd Lehrer/ es gleichwol damit auch so ferne  
komen/ das obgedachter Sacramentschwarm vñ  
schwaden/ viel seiner Kirchen/ Fürstenthumb vnd  
Derrschafften/ vnd viel seiner hochbegabter für-  
trefflicher Leute vnd Ingenia begriffen/ betöret/ vnd

Vorrede.

gleichsam bezaubert hat/ Denn auch sie die Sacramentsfeinde/ mit aller irer macht/ Kunst vñ listen/ dahin getrachtet/ wie sie solche ire giffit/ weit vnd ferne propagiren vnd ausbreiten/ vnd den anhang ihrestheils gros vnd sehr ansehenlich machen möchten/ Vnd gehet mit denselben noch leider heutiges tages/ nach dem 36. Psalm/ Sie ligen auff ihren Lagern/ vnd trachten schaden zu thun/ Sie stehen feste auff iren bösen wegen/ vnd schewen sich keines argen/ &c.

Ob denn wol in diesen vnsern Sechsischen vnd Meissnischen Landen vnd Kirchen/ durch Christliche/ ernste vnd trewhertzige Väterliche fürsorge vnserer hertzgeliebten Obrigkeit/ des Christlichen hochgebornen Fürsten vnd Herrn/ Herrn Augusti/ Hertzen vnd Churfürsten zu Sachsen &c. noch zur zeit diese beschaffung vnd fürsorge gethan worden/ das dieses Artickels wegen/ in seiner Churf. G. Landen/ Kirchen/ Schulen vnd Vniuersiteten/ vielgedachter Sacramentschwarm öffentlich nicht hat stat haben/ oder verteidigt werden dürffen: Wie denn höchstgedachter vnserer Obrigkeit/ die vielfältige Religions tractat/ handlungen/ bekentnis/ abschied vnd widerholungen/ die jr Churf. G. beydes auffer vnd inner Landes/ zu mehrmalen mit grossen schweren vnkosten hat halten/ anordnen/ stellen vnd geben lassen/ gnugsam vnd öffentlich zeugnis bey allen rechtglaubigen fromen hertzen geben/ Vnd ist ja ein mal an deme/ das ire Churf. G. So wol auch derselben hertzgeliebts Königlichen Ehegemahel/ sich offtmals haben klar vnd ausdrücklich erkleret vnd

Vorrede.

vnd vernemen lassen/das jr Churf. G. in ihren Landen/Kirchen/Schulen vnd Vniuersiteten/ ja in irem eigenen hertzen/ dieses Artickels wegen/ wie auch sonst von der gantzen Religion/ keine andere Lere/ glauben noch meinung/wissen/ halten noch schützen wolten/denn wie dieselbe von iren lieben Vorfahren/den Nochgebornen Chur vnd Fürsten zu Sachsen/durch Gottes sonderliche Gnade/ zu Augsburg/für dem gantzen Reiche öffentlich bekand vñ bezeuget worden/Vñ nachmals aus vnermeslicher barmhertzigkeit vnd Güte Gottes/ zu solcher Lere erkentnis vnd bekentnis/ S. Churf. G. geliebter Herr Vater/ der Nochgeborne Fürst vnd Herr/ Herr Heinrich/ Hertzog zu Sachsen etc. Christlicher gedechtnis/wunderbarlichen bracht) vnd kommen were/ Von deme folgendes dieselbe Lere vnd Bekentnis auff jr Churf. G. so wol derselben geliebten Herrn Bruder Churfürst Moritzen seliger/vorsellet/vnd derer wegen S. Churf. G. irer getrewen lieben Landschafft sich aller gnedigst verpflichtet/das S. Churf. G. sie bey derselben Religion vñ Bekentnis/vermittelst Göttlicher verleihung/gnedigst vnd bestendiglich schützen vnd erhalten wolte.

Als auch vnlängst etliche hochwichtige vrsachen furgesallen/dieses Artickels wegen/ eine kurtze widerholung voriger dieser Landen öffentlicher Bekentnis zu fassen vnd ausgehen zu lassen/ Wie denn für dreyen jaren geschehen/ da zu solcher wiederholung/ire Churf. G. alle derselben Theologen in beyden Vniuersiteten/ in allen dreyen Consistorien/vnd alle Superintendenten des Landes gnedigst

Vorrede.

erfordern vnd beschreiben lassen/Dette ihre Churf.  
G. welche mit gedachter einfeltigen widerholung/  
beneben andern Christlichen Königen / Chur vnd  
Fürsten/wol ersetiget vnd begnüget gewesen/gentz-  
liche hoffnung geschepfft/ Es solte dieses Artickels  
wegen/ in ihrer Churf. G. Landen / Kirchen vnd  
Schulen/ ferner kein miszuerstand/ verdacht/ zank  
oder zwiespalt/ viel weniger aber einige gefahr des  
Sacramentschwarms zu gewarten oder zu fürch-  
ten sein/Vnd zwar auch wir Theologen/ so der vns  
damals furgelegten Dresdnischen widerholung  
samt vnd sonderlich vnterscrieben haben / be-  
zeugen vnd bekennen fur der gantzen Christenheit/  
das wir damals eben in derselben guten hoffnung  
vnd vertrauen gestanden/ Bezeugen mit warheit/  
das wir in rechter einfalt/ vñ aus Christlichen trew-  
en hertzen vnd wolmeinung dieselbe gestalte For-  
mul/gemeiner bekenntnis/vns haben gefallen lassen/  
doch in keinem andern verstande noch meinung/den  
das dieselbe solte sein/ eine kurtze/ einfeltige vnd ei-  
gentliche Summa der Lere/ wie die von diesem Ar-  
tikel nu vber viertzig vñ funffzig jare in diesen Lan-  
den vnd Kirchen/nach Gottes Wort/ Augspurgis-  
cher Confession/Schmalkaldischen Artickeln/vnd  
nach Lutheri vnd Philippi Schrifften öffentlich ge-  
predigt/bekand/geleret vnd erhalten worden.

Vnd ist zu ende vielgedachter Dresdnischen  
Repetition/eben die Clausel mit itzgemeldeten wor-  
ten angehangen/Das man daraus zu spüren vnd zu  
ersehen hette/das die gedachte widerholung/nicht  
den Sacramentsfeinden/ öffentlichen oder heimlich-

### Vorrede

chen/zum vorteil oder vnterschleiff gestellet/Vnd wir  
dasjenige/ dessen vns etliche böse vnd vnruige Leu-  
te/ vnser vnd vnserer Lande Kirchen vnd Schulen  
abgesagte vnd geschworne Feinde/ öffentlich/ feinds-  
lich vnd schmelich beschuldigt/ nicht gesucht noch  
gemeinet/ viel weniger auch gedacht hetten/ das die  
Sacramentsfeinde so küne vnd vnuerschambt sein  
soltten/ das sie surgeben/ vnd Christliche Leute zu be-  
reden sich vnterstellen dürfften oder solten/ Es were  
alles das/ so in ermelter Repetition gefasset/ auch ire  
eigene Lere vnd Bekenntnis vom heiligen Abend-  
mal/ Denn vns je bewust/ das sie vnserer/ vnd vnserer  
Kirchen vnd Bekenntnis Feinde/ nu vber funffzig  
jar gewesen/ vnd sich eben vber diesem Deubtpunct  
vnserer Confession/ zu Augspurg Anno 1530. von  
dieser vnser Bekenntnis vnd Kirchen abgesondert/ vñ  
zu dem grewlichen riss vnd trennung/ die sieder der  
zeit gewesen/ alleine vrsach geben haben/ auch ihre  
schwermerey vnd lesterung noch nie erkant/ wider-  
ruffen/ oder Gott vnd seiner lieben Kirchen abgebe-  
ten/ Aber vber jtzgedachtes alles/ hat sich dennoch  
durch verhengnis Gottes/ vnd durch sein gerechten  
zorn vber der Welt vndanckbarkeit/ vnd vnauffhör-  
liche vnbusfertigkeit befunden/ das die Sacra-  
mentsfeinde/ durch anstiftung etlicher wenig Pri-  
uat Personen/ mit etlichen vnserer mittels Theolo-  
gen einen heimlichen fehrlichen verstand gesucht/  
gehabt vnd gefunden/ vnd derselben etliche dahin  
bewogen/ das sie allgemach angefangen/ die Sa-  
cramentschwermerey/ doch vnter einē andern schön-  
en vnd gleissenden schein/ zu entschuldigen/ zu be-  
schönen

Vorrede.

Schönen vnd schmücken/ zu propagiren vnd auszubreiten/ Zu welchem ende denn allerley vergiffte/ gedruckte vnd vngedruckte/ Sacramentirische Bücher in diese Lande eingeschoben/ vnd in die arme Jugend/ beneben den Sacramentirischen opinionen vnd gründen/ eingestreckt vnd eingebildet worden. Dis aber so heimlicher verdackter vnd geschwinder weise/ das die gefahr/ vnd jr vorhabend arglistig beginnen/ fast niemand hat sehen können/ noch öffentlich beschuldigen dürfen.

Als denn nach viel vorgehenden Christlichen vermanungen vnd verwarnungen/ dem Churfürsten zu Sachsen etc. vnserm gnedigsten Herrn/ von etlichen jren Freunden vnd Verwandten zukomen/ solche seiner Theologen Practiken vñ vorhaben/ durch sonderliche schickung Gottes/ vnuersehens offenbaret vnd entdeckt worden/ vnd S. Churf. G. aus vielen jren Briefen vnd Schrifften/ die jr Churf. G. zu jren handen erlangt/ so viel mit schmerzen vnd betrübniß jres hochfürstlichen gemütes befunden/ das alle sachen dahin vnd zu diesem ende gericht/ wie man Herrn Doctoris Lutheri Lere/ Glauben vnd meinung/ vñ also das allgemeine funffzigjerige Bekenntnis vom Abendmal des HERREN/ allgemach aus der Leut henden/ hertzen vnd gemüter ausreissen vnd ausrotten/ vnd dagegen die Sacramentschwermerey/ in diese Lande vnuermärckt ausbreiten vnd fortsetzen möchte/ Als hat höchstgedachter vnser gnedigster Herr/ auff gehalten statlichen Christlichen rat vnd bedencken/ jrer getrewen lieben Ritterschafft/ Landstende vnd Theologen/ eindringende

Vorrede.

gende vnuormeidliche notdurfft geachtet/ abermal  
elich wenige/ kurtze vnd klare Artickel/ Affirmatiue,  
als zur erklerung vielgemelter Dresdnischen Repe-  
tition/ aus Gottes wort/ Lutheri vñ Philippi schriff-  
ten/ vnd andern hievor gethanen öffentlichen Be-  
kenntnissen dieser Lande/ Vnd denn auch Negatiue  
aus den furnemesten der alten vnd newen Sacra-  
mentschwerner schriften/ zu fassen/ die ire Churf.  
G. beydes der Landschafft vnd Theologen fürzule-  
gen/ vnd darauff die verdecktigen Personen zu be-  
fragen hette/ Vnd also ein klarer/ liechter vnd vnuer-  
decktiger vnterschied/ zwischen vnserer vnd der Sa-  
cramentirischen Lere/ zu sehen vnd zu befinden were.

Zu diesem einigen/ vnd zu keinem andern ende/  
sind gegenwertige Artickel vnserer Bekentnis/ wie  
meniglich sihet/ gefasset vnd zusammen bracht wor-  
den/ welches anfangs derselben zu berichten wir für  
notwendig geachtet.

Ob denn wol vns leider für augen/ was für eine  
beschwerliche/ ergerliche vnd hochshedliche tren-  
nung vnd zurrüttung hieraus vnter vns selbs zu be-  
fürchten vñ zu befahren sein wil/ daneben auch wol  
verstehen/ wie hoch dessen allē vnserer gemeine Fein-  
de sich frewen/ vnd darüber erlustiget werden/ Viel  
auch derselben nachmals zu schreien/ vnd vns zu be-  
schuldigen/ keine schew noch scham haben werden/  
als ob wir selbs durch vnser allzu viel vertrauwen vnd  
gelindigkeit/ zu solchem vbel vrsach gegeben/ vnd  
daran nicht weniger als die jenigen selbs/ die sich  
des Sacramentschwarms theilhaftig gemacht/  
schuldig sein.

W

Vnd



Vorrede.

Vnd demnach es leider/ mit vns vñ vnsern Kir-  
chen schier das ansehen haben vnd gewinnen wil/  
das der Prophet Isaias von seiner zeit klagt/ Cap. 9.  
Ein jglicher frisset das Fleisch seines arms/ Manas-  
se dem Ephraim/ vnd Ephraim dem Manasse/ vnd  
sie beyde mit einander wider Juda ꝛc. So sind wir  
doch in betrachtung vnd zeugnis vnserer guten Ge-  
wissens vnd friedliebender hertzen/ dieser gantzlich-  
en vngeweiuelten hoffnung/ zuuersicht vñ vertrau-  
ens zu Gott dem **DEIN**/ das seine hand dieses  
alles wol endern/ vnd seiner lieben Kirchen vnd vns  
zum besten/ wenden kan vnd wird/ Das auch/ wie  
an gemeltem ort Isaie gesagt wird/ des **DEIN**  
hand vnuerkürtzt/ vnd noch ausgestreckt ist/ nicht al-  
leine die Gottlose Welt zu straffen/ sondern auch sei-  
ne liebe/ hochbetrübtte/ jemerlich zuriffene vnd ver-  
wundte Kirche zu befridigen/ zu heilen vnd zu erret-  
ten.

Wir sind auch zu allen Christlichen friedfertigen  
vnd der Wahrheit liebenden vnd begirigen her-  
tzen der tröstlichen hoffnung vnd trewen zuuersicht/  
sie werden aus gegenwertigen vnsern Artickeln  
Christlich vnd richtig vermercken vnd befinden/ das  
wir ja des Sacramentschwarms nicht schuldig  
noch teilhafftig sind/ auch für vns nichts neues/  
fremdbdes/ oder hiebeuor in diesem streit vnerhörtes  
oder vnbrenchliches furgeben vnd leren/ Sondern  
alleine das/ das in Herrn Lutheri Schrifften/ in  
Corpore doctrinae, Christlich vnd wol gefasst/ im re-  
chten verstand zusammen gezogen/ vnd ein klaren vn-  
terschied zwischen vnserer vñ der Sacramentschwer-  
mer

Vorrede.

mer Lere hiemit haben zeigen/ vnd Christliche herzen  
dafür verwarnen vnd verwaren wollen.

Bitten demnach alle vnd jede Christliche herzen/  
hohes vnd nieders Standes/ denen diese vnser  
Artickel furkomen werden/ vnd die etwan zu bösem  
argwon vnd verdacht/wider vns/vnser Kirche  
en vnd liebe Herrschafft/ durch vnserer misgünstigen  
vnd Widersacher geschrey vnd lesterung/ durch  
der Sacramentirer boschafft verkerung/ vñ endlich  
durch der vnsern vns vnberuften schedlichen zuneigung  
zu den Sacramentsfeinden/ vnd heimlichen  
verstand mit denselben/bewogen sein möchten/ Sie  
wollen vns solches verdachts Christlich erlassen/ vñ  
denselbigen itzige vnser wolmeinliche/ gründliche/  
deutliche vñ Christliche Erklärung entgegen setzen.  
Die Artickel/ wie sie von vns treulich vnd recht ge-  
meinet vnd gestalt sein/ one vorgefaste præiudicien,  
argwon vnd misstrawen/ auch one vnnötig vnd für-  
witzig grübeln/ verstehen/ an vnd auffnehmen/ vñ das  
zu vnserer lieben Obrigkeit vnd vns sich gantzlich vñ  
gewis versehen/ das wir durch Gottes gnedige hülff  
fe/ der Sacramentschwermerey vns nicht teilhafft  
machen wollen noch können/ noch einige gemein-  
schafft mit jnen vnd irer Lere/ suchen noch haben  
wollen/ so lang die Lehrer vnd verfechter solcher  
Schwermerey/ auff jren gefasten irrigen Opinions/  
schwermereischen Gründen/ verkerung vnd lesterung  
der wort vnd warheit Christi/ vnd vnserer Kirchen/  
vnbusfertig vnd halsstarrig bestehen vñ verharren.

Nach dem wir aber leider befunden vnd ver-  
marckt/ das die Sacramentsfeinde/ vnd die so vnter

Vorrede.

vns mit denselben heimlichen gerne eins sind vñ sein wollen/ire Schwermerey vnter dem schein vnd furtwendung Corporis doctrinae, vnd anderer Schrifften Herrn Philippi seliger/ die wir bisher als einen sonderlichen tewrbaren Kirchenschatz gehalten/ vñ zu halten gantzlichen entschlossen/ vñ für Gott auch schuldig sind/fortzusetzen/zu beschöner vnd zu schmücken sich vntersehen. Dabey auch/wie die heimlichen Briefe vnd Schrifften/etlicher irer Consorten gelautet/ Herrn Lutheri Schriffte vnd Bekenntnis vom Abendmal/ gantz zuuerdringen/ zuuerdrucken vnd hindan zu setzen gedenccken.

So zeugen wir hiergegen/ das wir weder mit den Sacramentirern/noch iren heimlichen Jüngern vnd Discipeln, dessen gantz nicht enig sind / noch sein können/Vnd das wir durch Göttliche verleihung / die beyde Menner / LV THER VM vnd PHILIPP VM, vnd ihre hochnütze vnd nötige Schrifften vñ Bücher/vns von einander nicht trennen/ oder reissen vnd nemen lassen können/ Sondern wie sie in ihrem Leben/ bis in iren seligen abschied/ einmütiglich neben einander gelebt / vnd zu förderung des wercks Gottes/ darzu sie mit einander beruffen/trewlich vñ seliglich in dem Hause des Herrn gedienet haben/ Also wollen wir ire Schrifften/ vnd rechten verstand derselben/als der rechten dieser zeit Elia vnd Elisa, auch beysamen ir gebürlicher danckbarkeit haben/ wissen vnd behalten.

Vnd so wenig wir andern vnruigen Geistern vñ Schwermern/die bisher wider diese Lande vñ Kirchen grewlich vnd one auff hören/ doch Gott lob/  
one

Vorrede.

one gnugsame vrsach vnd gründe/ gewüet vnd ge-  
lobet haben/nicht sollen noch wollen vorstatten/das  
sie vns Corpus doctrinae erleideten/ aus henden vnd  
hertzen rissen/Also wenig sollen vnd wollen wir/ mit  
Gottes hülf/ vns Herrn Lutheri Schrifften vnd  
Bücher/ hinderdringen/ nemen oder verdacht ma-  
chen lassen.

Darumb wenn wir vns auff's Corpus doctrinae  
beruffen/wolle sich niemand bereden lassen/das wir  
Lutheri Schrifften damit hindan gesetzt oder ver-  
worffen haben solten/ Sondern viel mehr wolle je-  
dermeniglich/ gantzlich vñ vngeweinet zu vns sich  
versehen/vnd dessen von vns gewis sein/das wir das  
mit keine andere/denn Herrn Lutheri Lere verstan-  
den vnd gemeinet haben wollen/Doch wollen wir  
diese vnser bezeugung auch mit dem furbehalt fer-  
ner erklaret vñ verwaret haben/ das wir alleine Got-  
tes Wort/die einige vnd ewige Wahrheit/ formam vñ  
normam das ist/ furbild vnd Regel reiner vnd ge-  
sunder Lere/gleuben/erkennen vnd ehren/vnd viel-  
ermelter vnser lieben Väter vnd Præceptorum Bücher/  
derselben alleine/ wie auch alles das vnser vnter-  
worffen haben wollen/ Den wir vns wolzubeschei-  
den wissen/das alleine Gottes Wort die Wahrheit ist  
vnd bleibet/in welcher alle Heiligen vnd Auserwel-  
ten geheiligt werden müssen/ vnd das keines Men-  
schen Lere oder Schrifften/ er heisse auch wie er  
wolle/Gottes Wort gleich zu setzen/oder darüber zu  
erheben ist/Sondern wie David sagt Psalm/19. Al-  
leine des **HEILIGEN** befehle sind richtig/vñ erfrewen  
an das hertze/Die Gebot des **HEILIGEN** alleine sind  
B 3 lauter//

Vorrede.

läuter / vnd erleuchten die augen / Die fürcht des  
DERRN ist rein / vnd bleibet ewiglich / Die Gebot  
des DERRN sind warhafftig / vnd alle sampt ge-  
recht / Sie sind tröstlicher denn Gold / vnd viel feines  
Goldes / Sie sind süßer denn Honig vnd Honigs  
feim / &c.

Letztlichen vnd schlieslichen / erinnern vnd bits-  
ten wir den Christlichen fromen Leser / er wolle sich  
an deme nicht ergern / das wir in negatiua sententia,  
vnd erzehlung der Sacramentschwermerey / auch et-  
licher Personen namhafftig haben gedenccken müs-  
sen / Denn solches je von vns der gestalt nicht gemei-  
net / das wir mit jnen zu zanken ursach suchen oder  
geben / vnd sie gleichsam vorsetzlich wider vns vnd  
vnseren Kirchen ausfordern vñ reitzen wolten / Son-  
dern weil vnserer vnd anderer Kirchen notdurfft ge-  
wesen / ein klaren vnterschied / vnserer vnd der Sacra-  
mentirischen Lere / zu zeigen / vnd die Gründe zu mel-  
den / auff welchen der streit vnd zwispalt zwischen  
jnen vnd vns je vnd allwege gestanden / vnd noch ste-  
het / Daben wir die Bücher vnd Tichter derselben /  
mit anzeigen vnd nennen müssen / damit meniglich /  
vnd sonderlich die vnberichteten vnd einfeltigen / se-  
hen vnd verstünden / das wir solche irrige Lere nicht  
ertichtet / oder ihnen zur vngedür vnd one grund zu-  
messen / Sondern wir / wegen der vergifften Schrif-  
ten vnd Bücher / die auch in diese vnseren Lande vnd  
Kirchen heuffig eingeschoben / vnserer widersprech-  
ens gnugsame / gründliche / erhebliche vnd Christli-  
che ursach hetten.

Wolle demnach ein jedes Christliches / friedlie-  
bendes /

Vorrede.

bendes/vnd der Wahrheit begirig hertze für den an-  
gezogenen Schrifften/ Irthumen vnd Opinionen  
der Sacramentsfeinde/ zu dieser verwirten betrüb-  
ten zeit/hiemit verwarnet sein/ vnd dafür sich hüten/  
vnd fürsichtiglich bewaren/Denn mit Giffte vmbzu-  
gehen nicht jedermans thun ist. Dergegen aber  
wollen inen Christliche hertzen vnd frome Hausves-  
ter/Derrn Lutheri (seligen) Schrifften/ vom heil-  
gen Abendmal/ so widerumb in ein Handbüchlin  
zusamen bracht/vnd ferner gedruckt werden sollen/  
ihnen Christlich befohlen sein lassen/die mit allem  
fleis lesen/ erwegen vnd inen einbilden/ So werden  
sie wider alle Sacramentschwermerey vñ giffte gnug-  
sam vnd wol damit verwaret sein vnd bleiben/dar-  
aus gründlichen bericht vnd trost finden vnd nemen  
können.

Bitten hiemit von grund vnser hertzens/ der  
ewige vnd lebendige Gott/der Vater vnser **DEUS**  
**DEUS** Ihesu Christi/ welcher durch **D. Lutherum**  
vnd **Philippum**/ das Liecht seines seligmachenden  
Worts/rechten verstand vñ seligen brauch der hoch  
würdigen Sacrament/ aus vnermeslicher barmher-  
zigkeit/der letzten Welt verliehen vnd gegeben hat/  
Er wolle nicht nach vnserm verdienst vnd vndanck-  
barkeit mit vns in seinem zorn handeln/ Sondern  
aus lauter gnaden vnd Barmhertzigkeit/ solches  
Liecht vns vnd vnsern armen Nachkommen/ gnedigst  
bis zu der frölichen widerkunfft seines lieben Sons/  
für vnd für leuchten vnd scheinen lassen. Vnd wie er  
durch **S. Paulum** vnsern Apostel/ des **NEWEN**  
Testament auch vns armen Heyden hat befohlen/  
vnd

Vorrede.

vnd darbey gantz gnedig vertrösten lassen/das solches bis auff die widerkunfft Christi erhalten werden vnd bleiben solle/vnd demnach auch seine liebe Kirche an allen den orten sein/bleiben/vnd gesamlet werden solle/da das gedechtnis der wolthatē Christi/vñ rechter verstand vnd brauch dieses des **ALTE** Testaments erhalten wird/Also wolle er auch vnter vns dasselbige rein vnd vnuerfelscht gnedigst bewaren/vns daraus seine Güte vnd Barmhertigkeit fur vnd fur erkennen/Predigen/Preisen vnd rühmen lassen/vns vnd vnserē Christliche liebe Obrigkeit/wider alle gefahr/verfolgung/anfeindung/lesterung vnd schmach/ gnedigst schützen/ stercken/trösten vnd verteidigen/vñ vns seiner ewigen waren Kirchen/lebendige Gliedmas sein vnd bleiben lassen.

Ach **ALTE** Ihesu bleibe bey vns/es wil lebend werden/Erhalte vnd heilige vns bey/in/vnd durch dein heiliges Wort vnd Wahrheit/Dein Wort ist die Wahrheit/Gedencke an deinen Bund/deñ deine liebe Kirche ist allenthalben jemerlich verheret/Las die Geringen nicht mit schanden dauon gehen/die Armen vñ Elenden rühmen deinen Namen/Wache dich auff Gott/vnd füre aus deine sache/Gedencke an die schmach/die dir teglich von den Thoren widerferet/denn das toben deiner Widerwertiger wird je lenger je größer/**ALTE**.

Die versamleten Theologen  
zu Torgaw.

Henricus

Henricus Salmuth D. Pastor Ecclesiæ Lipsensis,  
 Paulus Crellius Theologiæ Doctor subscripsit.  
 Caspar Eberhart Doctor, Pastor Ecclesiæ Christi in  
 vrbe Misena subscripsit.  
 Wolfgangus Harderus D. Pastor Ecclesiæ Lipsen-  
 sis subscripsit.  
 Martinus Mirus D. Concionator Aulicus subscripsit.  
 Adamus Rotherus D. Superintendens Ecclesiarum in  
 Episcopatu Merspurgenſi.  
 Georgius Langevoith D. Pastor & Superintendens  
 Ecclesiæ Chemnicensis.  
 Daniel Greſerus Pastor & Superattendens Dresdenſis.  
 Casparus Heyderich Pastor & Superattendens Tor-  
 genſis, manu propria subscripsit.  
 Nicolaus Jagenteuffel Pastor & Superintendens An-  
 nãmontanus subscripsit.  
 Ioannes Cornicælius Pastor & Superintendens Eccle-  
 siæ Hanenſis, manu propria subscripsit.  
 Samuel Iauchius Pastor & Superintendens Ecclesiæ  
 Fribergenſis, manu propria subscripsit, *de dō dō f. a.*  
 Franciscus Straus Pastor & Superintendens Ecclesiæ  
 Saltzenſis in Thuringia, manu propria subscripsit.  
 M. Petrus Glaſer Concionator Ecclesiæ Dresdenſis,  
 propria manu subscripsit.  
 M. Georgius Liſtenius Churf. Sechſiſcher Hoffprediger/  
 propria manu subscripsit.



C Interro